



Ўзбекистон ва Бирлашган Араб Амирликлари ҳамкорлиги:

**ЯШИЛ
ИҚТИСОДИЁТ
ОРҚАЛИ ЯНГИ
МАРРАЛАРГА ЙЎЛ**

Ўзбекистон етакчисининг шу йил 13-16 январь кунлари БААга ташрифи икки томонлама муносабатлар тарихида янги саҳифа очгани, хусусан, ҳамкорлик стратегик шериклик даражасига кўтарилгани билан аҳамиятли бўлди.

Ўзбекистоннинг Бирлашган Араб Амирликлари билан яшил иқтисодиёт соҳасидаги ҳамкорлиги нафақат экологик мақсадларга эришиш, балки мамлакатнинг стратегик манфаатларини таъминлашга қаратилган қадамлардан ҳисобланади. Зотан, Янги Ўзбекистоннинг стратегик мақсадларидан бири экологик барқарорликни таъминлаш, иқтисодий ўсишнинг ресурслар тежамкорлигига асосланган «яшил» ривожланиш моделига ўтишидир.

Бу йўлда эса мамлакатимиз муҳим қадамлар ташлашга ўтмоқда. Айни мақсадда 2025 йил Ўзбекистонда «Атроф-муҳитни асраш ва «яшил» иқтисодиёт йили» деб эълон қилинди. Ўтган йилнинг якунида Озарбайжоннинг Боку шаҳрида бўлиб ўтган «СОР-29» доирасида Ўзбекистон, Қозғистон ва Озарбайжон ўртасида яшил энергетика коридори бўйича шартнома имзолангани бу жараённинг муҳим воқеаларидан биридир. Ушбу коридор, бир томондан, экология соҳасидаги мақсадларга эришишга хизмат қилади, иккинчи томондан, минтақанинг ташқи энергетикага боғлиқлигини камайтиришга қаратилган. Ҳамкорлик натижасида минтақада янги энергетик

тик сўбат учун муқобил платформа яратилади.

Шуни алоҳида қайд этиш жоизки, «яшил» энергия соҳасида Бирлашган Араб Амирликлари Ўзбекистоннинг ишончли ва стратегик ҳамкоридир. Сўнгги йилларда Амирликлар билан инвестициялар портфели 26 миллиард доллардан ошган. Улар орасида қайта тикланувчи энергетика лойиҳалари асосий лоқомотив бўлмоқда.

Қолаверса, барқарор ривожланиш ҳафталиги давомида ҳам бир қатор муҳим учрашувлар бўлиб ўтди ва уларда Ўзбекистон учун аҳамиятли муҳим ҳужжатлар имзоланди.

БАА билан яшил иқтисодиёт йўналишидаги ҳамкорлик Ўзбекистон учун нафақат инвестиция, балки халқаро имижини мустаҳкамлаш учун ҳам катта имкониятлар эшигини очди. Амирлик компаниялари билан лойиҳаларнинг ҳам қириб келишига хизмат қилмоқда.

БААнинг глобал саҳнадаги оубўси, уларнинг замонавий технологиялар ва инноватив ечимлардаги лидерлик позицияси Ўзбекистон учун стратегик ҳамкор сифатида жоизбадор. Ўзбекистоннинг яшил иқтисодиёт

ва энергетикага қараётган эътиборини нафақат экологик ҳолатни яхшилаш, балки мамлакатнинг иқтисодий ва геосиёсий мустақиллигини таъминлашга қаратилган катта қадам сифатида баҳолаш мумкин. БАА билан ҳамкорлик эса бу мақсадларга эришишда муҳим воситадир.

Яна шуни алоҳида қайд этиш жоизки, мазкур йўналишда минтақавий ҳамкорлик тобора қучайиб, Марказий Осиёни «яшил» иқтисодий ривожланиш ва «тоза энергия» марказларидан бирига айлантириш борасида самарали ишлар олиб борилаётган. Марказий Осиёдаги яшил иқтисодиёт стратегияси Ўзбекистон учун келажакда минтақадаги энергетик марказлардан бирига айланиш имконини бериши мумкин. Бу нафақат миллий манфаатларга, балки глобал мақсадларга эришиш учун ҳам хизмат қилади.



Фарход
КАРИМОВ,
сиёсатшунос

Маълумотларга кўра, Ўзбекистонда 500 гигаваТт қуёш, 100 гигаваТт шамол ва 10 гигаваТт гидроэнергия ишлаб чиқариш салоҳияти мавжуд.

ЖЕКСОН- ВЕНИК ТУЗАТИШИ

унинг олиб ташланиши Ўзбекистон билан алоқаларда нималарни ўзгартиради?



АҚШда ҳокимият алмашяпти. Сайланган Президент Дональд Трамп 20 январдан сўнг президентлик ваколатларини бажаришга киришади.

Трамп АҚШ давлат котиби давлатимизга илгари сураётган асосий номзод – Марк Рубио. У шу кунларда Марказий Осиё бўйича муҳим баёнот билан чиқди. Рубининг фикрича, Марказий Осиё давлатларига нисбатан татбиқ этилаётган «Жексон ва Веник тузатиши» алмиқоддан қолган эскилик сарқитидир ва уни тўлиқ олиб ташлаш зарур.

Бу тузатиш икки конгрессмен – Генри Жексон ва Чарлз Веник ташаббуси билан СССРда инсон ҳуқуқларининг бузилиши, совет фуқаролари учун эмин-эркин қўчиб кетиш ҳуқуқи берилмаётганига қарши жазо чораси сифатида 1974 йили қабул қилинган ва АҚШнинг «Савдо тўғрисида»ги қонунига киритилган эди.

1991 йилга келиб, СССР қулади. Аммо бу тузатиш бекор бўлмади. Ўз-ўзидан янги пайдо бўлган мустақил давлатларга, хусусан, Ўзбекистонга нисбатан ҳам сақланиб қолаверди.

Марк Рубиога қадар олдинги АҚШ сиёсатчилари-ю, давлат котиблари ушбу тузатишдан воз кечиш вақти келганини кўп бор таъкидлашган.

Ҳозирда бу тузатиш фақат рамзий тусга эга. Реал ҳаётда АҚШнинг на Ўзбекистон, на бошқа қўшни давлатлар билан савдо-иқтисодий ва сиёсий муносабатларида Жексон-Веник тузатиши таъсир кучига эга эмас. АҚШ қонунчилиги кўра, ҳатто бу тузатиш тўлиқ ишлаб турган вақтда ҳам, Президент ва Давлат котибининг ушбу тузатиш ҳосил қиладиган санкцияларни бир йилга ёки маълум муддатга бекор қилиш ҳуқуқи бор ва у авваллари кўп бор қўлланилган.

Иккинчидан, бу тузатиш назарда тутган инсон ҳуқуқлари билан боғлиқ муаммолар тарих катларида қолиб кетди. Бугун на Ўзбекистон ва на Марказий Осиёнинг бошқа давлатлари миграция ёки эмиграцияга тўсқинлик қилади. Тўғри, минтақа давлатларида инсон ҳуқуқлари билан боғлиқ муаммо ва камчиликлар бор. Аммо минтақанинг ҳеч бир давлати собиқ СССР каби тоталитар табиатга эга эмас. Қолаверса, минтақа ҳуқуқий давлатчилигини англаш ва шакллантириш йўлида давом этмоқда.

Ҳўш, Марк Рубининг ушбу тузатишини олиб ташлаш бўйича баёноти олдинги давр сиёсий лидерлари баёнотидан нимаси билан фарқ қилади? Аввало, бу сафар республикачилар нафақат президентлик курсисини эгаллади, балки Сенат ва вакиллар палатасида ҳам кўпчилик ўринларини қўлга киритди.

Яъни, авваллари бирон-бир давлат котиби шундай ташаббус билан чиқса, рақиб партия бу лойиҳага вето қўярди. Бу сафар ушбу ташаббусни охиригача этказиш имкони бор.

Қолаверса, ушбу тузатиш сақланиб қолган тақдирда ҳам, Ўзбекистон – АҚШ муносабатларига соя сола олмайди. Аксинча, АҚШда бюрократия чуқур илдири отган, оғирқарвон, ўзаро тийиб туриш ва рақобат сабаб рационализмдан анча чекинган бошқарув модели юзага келганини англаш ва тарихий «фрелик» эканига ишора қилиб туради.



Камолитдин
РАБИМОВ,
сиёсатшунос



Озарбайжон Маданият маркази масъуллари «Ishonch»да

Ўзбекистондаги Ҳайдар Алиев номидаги Озарбайжон Маданият маркази масъуллари – Марказнинг янги тайинланган раҳбари Акиф Марифли ҳамда марказ маъмури Юсиф Маммадов «Ishonch» ва «Ishonch-Доверие» газеталари таҳририятида бўлишди.

Учрашувда икки мамлакат халқлари ўртасида олиб борилаётган дўстона ҳамкорлик янги босқичга чиқаётгани эътироф этилди.

Таҳририят бош муҳаррири Хусан Эрматов меҳмонларга газеталар ва сайт фаолияти ҳақида батафсил маълумот бериб ўтди.

Шу асно Озарбайжон Маданият маркази масъуллари ishonch.uz сайтининг медиа маркази ҳамда «Ishonch» ва «Ishonch-Доверие» газеталаридаги иш жараёни билан ҳам яқиндан танишдилар.

Конвергент таҳририят фаолияти меҳмонларда катта таассурот қолдирди.

«Ishonch»ни

Telegram каналида ҳам кузатиб боринг!





Ишсиз эди, ишли бўлди ЯНА 10 ҚЎШНИСИНИ ИШЛИ ҚИЛДИ



Давлатимиз раҳбарининг ташаббуси билан ҳаётга таътиб этилган «Аёллар дафтари» орқали кўплаб муаммолар ҳал этилмоқда. Хусусан, Фарғона вилоятида ўтган йиллар давомида «Аёллар дафтари»га киритилган хотин-қизларга кўрсатилган ёрдам сабаб уларнинг бири тадбиркорга, бири иш берувчига айланди, бошқасининг эса доимий бандлиги таъминланди.

Узюкка бормайлик, «Аёллар дафтари»нинг 5-босқичи доирасида 800 мингдан ортиқ 30 ёшдан юқори бўлган хотин-қизлар ўртасида анкета-сўровномалар асосида хатлов ишлари амалга оширилди. Ўрганишлар натижасига кўра, 109 минг 506 нафар хотин-қиз «Аёллар дафтари»га киритилди. Уларнинг барчасига тоифаси бўйича амалий ёрдамлар кўрсатилди. Бунинг учун Республика ва маҳаллий бюджет ҳамда бошқа манбалар ҳисобидан 69,5 млрд. сўм маблағ сарфланди. Ушбу эзгу ташаббуснинг давоми сифатида «Аёллар дафтари»нинг 6-босқичи бошлангани ҳеч бир хотин-қиз эътибордан четда эмаслигини кўрсатди. Вилоятда 1 минг 63 та маҳалла фуқаролар йиғини мавжуд. Айни пайтда «Маҳалла еттилик» секторлар ишчи гуруҳлари билан биргаликда анкета-сўровнома

асосида хотин-қизларнинг барча йўналишдаги муаммолари уйма-уй юриш орқали ўрганиб чиқилмоқда. Бундай ишлар Бувайда туманида ҳам белгиланган тартиб бўйича олиб боришмоқда. — Маҳалламизда истикомат қилаётган 3 минг 510 нафар аҳолидан 1 минг 776 нафари аёллар. Уларнинг 652 нафари 30 ёшдан ошган хотин-қизлардир, — дейди тумандаги «Янги ҳаёт» МФЙ хотин-қизлар фаоли Садокат Бойматова. — Ҳозир ҳар бир хонадонга кириб, хотин-қизлар билан суҳбатлар ўтказиш орқали уларни қийнаётган муаммоларни анкета-сўровномага қайд этилди. Ўтган йили 5-босқич доирасида 105 нафар хотин-қиз «Аёллар дафтари»га киритилган эди. Уларнинг барчасига тоифалар бўйича зарур кўмак кўрсатилиши натижасида муаммоларига ечим топилди. Шу маҳаллада яшовчи Умидахон Раҳмонова ҳам ишсизлиги боис «Аёллар дафтари»га киритилган эди. У хунар эгаллашни афзал билди. Мономарказда тикувчиликни ўрганди. Кўп ўтмай бинойидек чеварга айланди. Унга субсидия асосида тикув машинаси берилди. Ўрганган хунари асосида уйда тикувчиликни бошлаб, кам бўлаётгани йўқ. Гавҳар Мамажонованинг бошидан ҳам кўп савдолар ўтди. Вояга етган ўгли ишлаб пул топаман деганда автохалокатга учраб, соғлигидан айрилди. Ўрганишлар асосида она «Аёллар дафтари»га киритилди. У ишчи

гуруҳга уйда кан-долачилик билан шугулланиш истаги борлигини айтди. Шунга кўра, унга кредит ажра-

тилди.

Яхши ниятда бошланган иш тезда юришиб кетди. Дастлаб ўзи ишлади, буюртмалар кўпайгач, қўшниларини ёрдамчиликка олди. Ҳозир у билан 10 нафар аёл меҳнат қилмоқда. — «Аёллар дафтари» туфайли елкамга офтоб тегди. Кўз термасин, маҳсулотларимизнинг бозори чаккон. Ҳозир Сурхондарё, Қашқадарё, Жиззах вилоятларига маҳсулот етказиб бераймиз, — дейди Гавҳар Мамажонова. Мамлакатимизда бошланган ушбу хайрли ва эзгу ташаббус кийналган аёлларга мадад бўлиб, уларнинг орзуларини рўёбга чиқаришга имкон яратмоқда.

Жамшид ЭРҒАШЕВ
«ISHONCH»



Ўзбекистон қасаба уюшмалари Федерацияси Қорақалпоғистон кенгашида «Аёллар дафтари»ни шакллантириш бўйича бажарилиши лозим бўлган ишлар хусусида йиғилиш бўлиб ўтди.


Унда прокуратура, ички ишлар, Оила ва хотин-қизлар бўлими, туман ва шаҳарлардаги маҳалла раислари, ижтимоий ҳимоя агентлиги, тиббиёт, банк мутасаддилари, халқ таълими ва бошқа ташкилотлар масъуллари ҳамда қасаба уюшма фаоллари иштирок этишди. Тадбир аввалида Федерациянинг Қорақалпоғистон кенгаши раиси Улугбек Жалменов «Аёллар дафтари» тизимини юритишнинг янги тартиби, киритилган айрим

198 000 нафар хотин-қизга АМАЛИЙ КЎМАК КЎРСАТИЛГАН

ўзгартиришлар, шунингдек, индивидуал дастур, йўл харитаси, хатлов, анкета тўлдирish масалалари, мазкур тизимнинг олтинчи босқичида амалга оширилиши натижасида таълим ва фан ходимлари қасаба уюшмаси Республика кенгаши раиси Равшан Бедилев сўзга чиқиб, ўтган йили Қорақалпоғистонда бешинчи босқичда қарийб 198 000 нафар

хотин-қизга амалий ёрдамлар кўрсатилгани ва камбағаллик икки баробар камайганини алоҳида таъкидлади. Қорақалпоғистон Республикаси прокуратурининг ўринбосари Шерзод Мухаматов Президентимиз ташаббуси билан жорий қилинган мазкур тизимнинг афзалликлари ва галдаги вазифалар ҳақида сўзлаб берди.

Фотима АБДУРАИМОВА
«ISHONCH»



Махсуда Тошқўзиева ёлғиз ўзи 2 нафар фарзандини тарбиялайди, собиқ турмуш ўртоғидан ҳеч қандай алимент пули олмайди. Камига оғир хасталиқдан азият чекади, ишсиз, ижарада ўтиради. Ҳозирги кунда унинг ўзи ва 20 ёшли қизи Омيناбону Наманган шаҳридаги хусусий университетнинг 3-курс талабаси. 6 ёшли қизчаси Афруза болалар боғчасига қатнайди.

Миллатни ўқитишга МЕНГЗАШ МУМКИН

Унинг ижтимоий аҳволини «Аёллар дафтари» мутасаддилари атрофлича ўрганиб чиққач, олий ўқув юртига кон-

тракт пули тўлаб бериладиган бўлди. Наманган шаҳар ҳокимининг ўринбосари, Оила ва хотин-қизларни қўллаб-қувватлаш бўлими бошлиғи Дилором Абдурахимова олий таълим муассасаларида тахсил олаётган ижтимоий

муҳофазага муҳтож хотин-қизлар билан учрашди. Самимий руҳда ўтган давра суҳбатда давлатимиз раҳбари томонидан хотин-қизларни қўллаб-қувватлаш борасида олиб борилаётган тизимли ишлар, яратилаётган имконият ва имтиёзлар тўғрисида маълумот берилиб, «Аёллар дафтари» жамғармаси ҳисобидан 9 нафар хотин-қизга контракт пуллари ўтказиб берилди. — Аёлларни ўқитсак, бутун бир миллатни ўқитган бўламиз, — дейди Дилором Абдурахимова. — Шу боис, уларга қатор имтиёзлар яратиб берилади. Жумладан, алоҳида квоталар, контракт тўлови учун фойсиз имтиёзли кредитлар ажратилади, магистратурага ўқишга қирган хотин-қизларнинг контракт тўловлари 100 фоиз давлат томонидан тўлаб берилмоқда. Бу хайрли ишлар жамиятни, келажакимиз эгаларининг интеллектуал салоҳиятини юксалтиришга хизмат қилаётган.

Анваржон ҲАЛИМОВ
«ISHONCH»



Оламда БУГУН

Қатар Бош вазири шайх Муҳаммад бин Абдулраҳмон Ол Соний томонидан эълон қилинган Исроил ва ҲАМАС ўртасидаги оташкес келишувни Исроил ва Фаластин ўртасидаги узоқ йиллик можароларнинг зулматли солномаси узра умид нуруни ёққан-дек бўлди. Ўн беш ойдан бери давом этаётган, ўн минглаб инсонлар ёстиғини қуритган ва миллионлаб одамларни бошпанасиз қолдирган ҳалокатли урушда ҳатто вақтинчалик тинчликка эришишнинг ўзи ҳам катта гап.

Ўт очишни тўхтатиш ва асирларни алмашиш бўйича уч босқичли келишув мазмуни 2023 йил июлида АҚШ президенти Жо Байден томонидан тақлиф этилган ва БМТ Хавфсизлик Кенгаши ҳамда ҲАМАС томонидан маъқулланган келишув лойиҳаси билан деярли бир хил. Аммо Исроил сўнгги етти ой мобайнида янгидан янги шартларни илгари

суриб, бир неча бор музокараларни тўхтатган эди. Бу сафар ундай бўлмади. Бунинг бир қатор сабаблари бор, албатта. Исроил бош вазири Биньямин Нетаньяху ҳукумати Исроил армияси ичидagi қаршиликларга қарамай, уруш бошидан ҲАМАСни бутунлай йўқ қилиш ниятида эди. Қолаверса, Исроил стратегик аҳамиятга эга Нетзарим ва Филдельфи (Саладин) коридорлари каби кўплаб ҳудудларда доимий ҳарбий назоратни ўрнатди. Ҳазо шимолни тўлиқ эвакуация қилиб, уни ёпиқ ҳарбий зонага айлантириш ёки у ерга Исроил фуқароларини жойлаштиришни режалаштирганди. Бироқ бу режалар иш бермади. Исроил армияси қаттиқ қаршиликка дуч келди ва ўз назоратидаги шимоллий ҳудудларда ҳам катта йўқотишларга учради. Бунинг устига, Исроил халқаро миқёсда ҳам яққаланиб қолди, иктисодиёти миллиардлаб долларни йўқотди,

БУ КЕЛИШУВ МИНТАҚАНИНГ ўзини-ўзи тиклаш қобилиятини синовдан ўтказадиган имконият сифатида БАҲОЛАНМОҚДА. ВАҲОЛАНКИ, ГАП ФАҚАТ ҚИЛ УЧИДА ТУРГАН ТИНЧЛИКНИ САҚЛАБ ҚОЛИШГИНА ЭМАС, БАЛКИ УЗОҚ МУДДАТЛИ БАРҚАРОРНИ ЕЧИМГА ПОЙДЕВОР ЯРАТИШ ҲАҚИДА КЕТМОҚДА. АММО ТОМОНЛАР ЎРТАСИДА ЖУДА КАТТА ОҒРИҚ ВА ИШОНЧСИЗЛИК БОРКИ, БУ ТИНЧ КЕЛАЖАК ҲАҚИДА ИШОНЧ БИЛАН ГАПИРИШ ИМКОНИНИ БЕРМАЙДИ. АГАР МОЖАРОНИ ХАЛ ЭТИШ БЎЙИЧА АНИҚ ҚАДАМЛАР ТАШЛАНМАСА, ҲАТТО ВАКТИНЧАЛИК ТИНЧЛИК ҲАМ УЗОҚ ДАВОМ ЭТМАСЛИГИ МУМКИН.

ўн минглаб одамлар мамлакатни тарк этди. Тарихда илк бор Исроилнинг обрўсига жиддий путур етди. Бугун кўплаб Европа давлатлари агар Нетаньяху уларнинг ҳудудига кирса, Халқаро жиноят суди қарорига кўра, уни ҳибсга олишини маълум қилишган. Бу жараёни АҚШнинг сайланган президенти Дональд Трампнинг қутилмаган босими яқунлаб берди. Нетаньяху ва унинг ҳукумати Трамп президентлигига сайлангач, эркин ҳаракат қилишдан умидвор эди. Бироқ, Исроилни тўлиқ қўллаб-қувватлашга қарамай, Трамп можарони тугатиш, вазиятни юмшатишни талаб қила бошлади. Азалий душман томонлар ўртасида дипломатик қўприк вазифасини ўтаётган Қатар музокаралар учун ўз ҳудудини тақдим этди. Жума кuni эрталаб Исроил бош вазири Биньямин Нетаньяхунинг идораси Исроил, ҲАМАС, АҚШ ва Қатар ўртасида ўт очишни тўхтатиш ва Ҳазо секториде асирларни озод қилиш бўйича келишув имзоланганини тасдиқлади. Бош вазир келишувни маъқуллаш учун ҳукумат йиғилишини ўтказди. Ҳазо секторидеги можаро томонлари — Исроил ва ҲАМАС ҳаракати Қатар, Миср ва АҚШнинг воситачилигида 42 кунлик ўт очишни тўхтатишга келишиб олдилар. Келишувнинг илк босқичи 33 нафар исроиллик асирни тахминан минг нафар фаластинлик маҳбусага алмаштиришни кўзда tutади. Исроил қўшинлари Ҳазо сектори чегарасига чекинади, аммо ҳозирча сектор ичиде қолади. Тинчликнинг биринчи кунидан бошлаб инсонпарварлик ёрдами етказиб бериш ҳажми оширилади — кунига 600 та, шу жумладан, 50 та ёқилги юклаган юк машинаси ўтказилади. Фаластинликлар учун 200 мингта ўтов ва 60 мингта мобил уй етказиб берилади. Келишув қафиллари — Қатар, Миср ва АҚШ Қоҳирада мувофиқлаштирувчи марказ туздилар. Тинчликнинг 16-куниде Исроил ва ҲАМАС келишувнинг иккинчи босқичи бўйича музокараларни бошлашга мажбур. Бу босқичда қолган асирларни озод қилиш, жанговар ҳаракатларни тўлиқ

Ҳазодаги ВАЗИЯТ:



тўхтатиш ва Исроил қўшинларини тўлиқ олиб чиқиш кўзда тутилади. Учинчи босқичда жасадларни алмашиш, Ҳазо секторини қайта тиклаш ва унинг қамалини тугатиш керак. Бу можаро давомидаги иккинчи оташкес келишувни



**Эрта она тилим агар йўқолса,
мен бугун ўлишга бўлурман ризо.**

Расул ХАМЗАТОВ

Ўзбеклигингиздан Уяласизми?...

Пойтахт кўчаларида кўнгилдан кетган ўйлар



Мирнодир МИРАКМАЛОВ олган суратлар

Қайсидир мамлакат осмонда юрадиган такси ихтиро қилиб, амалиётга татбиқ этаётган бир пайтда биз шундай сарлавха билан нимадир ёзишимиз бошқалар туғул ўзимизга ҳам малол келяпти, очинги. Нима, ёзамиз десак, бундан бошқа долзарб муаммо йўқми? Бор, албатта! Лекин биз сўз юритмоқчи бўлаётган мавзу баъзи бировлар илдоо қилаётганидек, майда масала эмас. Аксинча, у миллат тақдир, эртанги кун, янада аниқроғи, она тилимиз билан боғлиқ ўта муҳим, керак бўлса, ҳар кун гапириладиган ўта жиддий масала!

Гап кўчалардаги савдо дўконлари ва аҳолига хизмат кўрсатадиган турли шохобчаларга қўйилган номлар хусусида борапти.

Ҳа, бу ҳақда кўп ва ҳўб гапирилган, гапириляпти, ёзилган ва ёзиляпти ҳам. Аммо натижа йўқ! Шу боис биз яна пойтахт кўчалари бўйлаб пиёда юриб, кўрганларимиз асосида мақола ёзишга аҳд қилдик.

Ў НАВОЙИ ИНГЛИЗ БЎЛГАНМИ?

Ўрдадаги анҳордан ўтгач, Алишер Навоий кўчаси бошланади. Ҳа, ул зот буюк шахс. Ўзбек миллатининг фахри. Айниқса, тилимизнинг қадри топиши ва шу кунгача етиб келишига жуда катта ҳисса қўшган улуг шоир. Унинг миллат йўлида қилган ишларини эсланинг сайин кўксинг гурур-ифтихорга тўлади. Пойтахтнинг асосий кўчасига унинг номи берилгани ҳам шундан бўлса, ажабмас. Аммо...

Бу кўча бўйлаб кетаркансан, таъбингни хира қиладиган, кўнглингни ранжитадиган ҳолатларга, ажнабий тилдаги сўзлар битилган шохобчаларга дуч келаверасан. Не илинж, умид билан девор пештоқларидан унга оид бирон-бир сўзни излайсан. Лекин кўзларинг фақат ўзга қаратилган тили билан битилган сўзларга тушаверади. Қайси кўча эканини англаувчи кичкина пешлавҳани ҳисобга олмаганда ва Алишер Навоий номидаги давлат музейи биноси ва унинг олдидаги ҳайкалгача у билан боғлиқ ҳеч нарсага дуч келмайсан. Қаерга қарама, инглизча алламбало номлар. Ўзингни худди Европанинг қайсидир мамлақати кўчасида юргандек сезасан... Дўконининг пештоқига қандайдир ўзи ҳам тушунмайдиган ҳорижий сўзни битган тадбиркорга ачинасан... Шуларнинг ўрнига «Ширин», «Лайли» ёки «Фарҳод», «Искандар» деган номларни қўйса бўлмасмикан, дея қуюнасан... Лекин бундан фойда йўқ. Чунки бизнес марказ очишга ақли етган мардумнинг ўзбекча ном танлашга фаросати етмайди. Ёки етса ҳам, буни ўзига эп кўрмайди. Та-

гини суриштирсангиз, шу кўчадаги дўконларнинг ҳаммаси ўзбекларга тегишли бўлиб чиқади. Лекин улар катта эҳтимол билан ўзлигини билмайди. Акс ҳолда, шохобчасига бунақа ном қўймаган бўларди...

Чамамда, ҳазрат Навоий бошимизга шу кунлар келишини олдиндан билган экан. Акс ҳолда, «Муҳокамат ул-луғатайн» асарига қуйидаги сатрларни битмасди: «Аммо туркнинг улугдин кичигига дегинча ва навқардин бегига дегинча сорт тилидан баҳраманддурлар, андоққим ўз хўрд аҳволига кўра айта олурлар, балки фасоҳат ва балогат билди ҳам тақаллум қилурлар. Ҳатто турк шуаросиким, форсий тил билди рангин айбур ва ширин гуфтор зоҳир қилурлар. Аммо сорт улусининг арзалидан ашрофигаҳа ва омийсидан до-нишмандигаҳа ҳеч қайси турк тили билди тақаллум қила олмаслар ва тақаллум қилгоннинг маънисин ҳам билмаслар. Агар юздин, балки мингдин бири бу тилни ўрганиб сўз айтса ҳам, ҳар киши эшитса билур ва анинг сорт эканин фаҳм қилур ва ул мутақаллим ўз тили билди ўз расволигаҳа ўзи иқрор қилгондекдур».

Шу ҳаёллар билан Ҳадрага етиб келдик. Алишер Навоий кўчасидан сўнг йўлимиз Абдулла Қодирий кўчасига туташди. Биз у ерда «Кумуш»ни учратармиз деган умидда эдик...

«ОТАБЕК» У «КУМУШ» ЛАР ЯРАШМАСМИДИ?

Афсус, Абдулла Қодирий кўчасидаги манзара ҳам дилини хира қилгудек даражада экан. Кумуш у ёқда турсин, ҳатто Абдулла Қодирийни эслададиган миттигина деталнинг ўзи йўқ. Ҳар бир дўкон пештоқида ажнабий номлар. Масалан, дўконларга максаси ва хизмат кўрсатиш туридан келиб чиқиб, «Отабек» ёки «Кумуш» деган ном қўйилса, ярашмасмиди?

Булар тадбиркорлар. Мулк ўзиники, шундай экан, истаган номни беришга ҳақи бор дерсиз. Шундайку-я, аммо шунини унутмаслик керакки, тил масаласи шу миллатнинг ҳар бир фуқароси, яъни хоҳ тадбиркор, хоҳ мансабдор бўлсин, барчага бирдек дахлдор масала.

Ҳўш, масъуллар қаерга қарашляпти? Нега бу ҳақда бош котиринмаяпти? Масалан, Республика Маънавият ва маърифат маркази ёки Ёшлар ишлари агентлиги, боринг ана, шаҳар ҳокимлиги ташаббус билан чиқиб, шу кўчаларга Навоий ва Қодирий ғазаллари, асарлари, биткиларидан айрим мисралар келтирилган пешлавҳалар ўрнатса бўлмайди? Нима учун мутасаддилар бу ҳақда жиддий бош котиринмайди? Ёки бу борада ҳам юқоридан бўйруқ бўлишини кутишармикан?

Афсус, тилимиз борган сайин кадрезилиб борапти. У ҳақида фақат бир йилда бир марта, яъни 21 октябрь – Ўзбек тилига давлат тили мақоми берилган кунни қайгуриб қоламиз, холос. Гўёки ҳаммамиз тилининг жонқурига айланамиз. Кейин эса, ҳаммаси яна ўша эски ҳаммом, эски тослигича қолиб кетаверади. Янги марказ, ҳудуд, шаҳар ва шохобчалар ажнабий номлар, ҳорижий сўзлар билан бойиб бораверади. Улар орасидан ўзбек тилида битилган лоақал битта жумлани топиш илинжида кўчаларни кезаверамиз, кезаверамиз... Ахир, қачондир келиши керак-ку, биз кутган кунлар...

Шу ўринда Абдулла Қодирийнинг сўзлари ёдга тушади:

«Ўзбек тили камбағал тил эмас, балки ўзбек тилини камбағал дегувчиларнинг ўзи камбағал. Улар ўз нодонликларини ўзбек тилига тўнкамасинлар».



Гулумжон МИРАХМЕДОВ «ISHONCH»



Келажакни АРОҚҚА алмашманг!

– Дадам ёлгончи, барибир, олиб бермайди.
– Нимани олиб бериши керак?
– Буви, дадамга қачондан буён шахмат олиб беринг, дейман. Лекин ҳар сафар «Шошмай тур!» дейди.

– Дадангни ҳам тушун-да, болам. Бутун рўзгор бўйида. Камига кредитлари бор. Ўзим айтиб қўяман, агар бу сафар ҳам олиб бермаса, шахмат сендан айлансин, пенсиянинг бир қисмини сарфлаймиз, болажоним.

Бу суҳбат яқинда бир ошнамнига борганимда қўлоғимга чалинди. Оғайнимнинг 9 ёшли фарзанди бувисининг сўнгги гапидан жуда хурсанд бўлиб кетди.

Шахмат мавзуси ҳақида оғайнимдан сўрадим.

– Қўрмайсанми, бир-икки ойдан бери шахмат олиб беринг, деб хол-жонимга қўймайди, – деди у. – Деярли ҳар кунни шу гап. Мен унга «Ҳозир пулим йўқ, бироз шошмай тур», десам сира кўнмайди. Кошки, шахмат ўйнаб дунёни олиб берса. Ундан кўра, қўйларни боқсин, шундан фойда...

Энг кизиги, ўша кунни кечқурун чойхонада оғайнилар билан йиғилдик. Давра роса қизиди. Бир маҳал ўғлига шахмат олишга пули йўқ ошнам эриб кетиб, иккита ароқ учун официантга 200 минг сўм узатди.

Очинг, ўша пайтда роса ажабландим, жаҳлим ҳам чиқди.

Наҳотки, фарзандининг орзусидан ароқ устун бўлса? Ота ўша 200 минг сўмга ўғлига зўр шахмат олиб берса бўлади-ку! Ким билсин, балки ўғил ўша шахматни ўйнаб, халқаро гроссмейстер бўлар. Чемпион бўлмаган тақдирда ҳам, етуклик сари дадил қадам ташлар. Афсуски, буни ота тушунганида. Агар тушунганида ўғил аллақачон шахматли бўларди. Фарзанд учун сарфланган пул – келажакка киритилган инвестиция-ку, ахир! Буни ошнам билармикан, тушунармикан?..

Кеча ҳалғи ошнам телефон қилиб, кечқурун яна чойхонада ўтиришни таклиф қилди. Сўзсиз унга рад жавобини бердим. Мен ундан, «Ўғлинга нега шахмат олиб бермапсан, пулинг бор-ку!», деб сўрамоқчи бўлдим, лекин индамай қўя қолдим.

Аслида ошнамга ва унга ўхшаганларга бир сўз айтгим келганди:

Фарзандлар келажакни ароққа алмашманг!

Умид ХУДОЙҚУЛОВ «ISHONCH»

мураккаб ва нозик муроса



бўлди. Дастлабки келишув 2023 йилнинг ноябрида имзоланган бўлиб, олти кун давом этган эди.

Томонлар бу келишувга турлича муносабат билдирыпти. Исроилда минглаб одамлар асирликдаги ватандошларининг

эҳтимолй қайтишини нишонлаш учун кўчаларга чиқдилар. Бирок жамиятнинг аксарият қисми ушбу келишувни хавотир билан қабул қилар экан, уни миллий хавфсизликка таҳдид сифатида кўряпти. Ҳукумат ичидаги сиёсий қарама-қаршиликлар ўнг қанот вазириларнинг келишувни «хавфли» ва «қабул қилиб бўлмас» деб баҳолашида намоён бўляпти. Исроил бош вазири Биньямин Нетаньяху ҳукумат коалицияси тарқаб кетишининг олдини олиш мақсадида молия вазири Бецаел Смотрич ва миллий хавфсизлик вазири Итамар Бен Гвир каби ўта ўнг қанот иттифоқчиларига 42 кунлик биринчи тинчлик босқичидан сўнг урушни қайта бошлашни ваъда қилмоқда, деган фикрлар ҳам йўқ эмас.

Узлуксиз бомбардимонлардан қарчаган Ғазодаги тинч аҳоли эса ушбу янгиликни тоза ҳаво янглиқ қабул қилди. Улар учун бу келишув ҳадик-хавотирсиз ҳаёт ҳам борлигини ёдга солди.

Нима бўлганда ҳам, бу келишув кўплаб халқаро кучларнинг иштирокидаги мураккаб музокаралар натижасида эришилди. Жо Байден бу натижани «мустаҳкам дипломатия»нинг ютуғи деб атади ва 2024 йилнинг майида илгари сурган уч босқичли тинчлик режасини ёдга олди. Ушбу режа томонларни урушни тўлиқ тўхтатиш ва Ғазо секторини қайта тиклаш бўйича мулоқотга чақиришни мақсад қилган эди.

КЕЛИШУВНИНГ ИЛК БОСҚИЧИ 33 НАФАР ИСРОИЛНИК АСИРНИ ТАХМИНАН МИНГ НАФАР ФАЛАСТИНЛИК МАҲБУСГА АЛМАШТИРИШНИ Кўзда тутади. ИСРОИЛ ҚўШИНЛАРИ ҒАЗО СЕКТОРИ ЧЕГАРАСИГА ЧЕКИНАДИ. АММО ҲОЗИРЧА СЕКТОР ИЧИДА ҚОЛАДИ. ТИНЧЛИКНИНГ БИРИНЧИ КУНИДАН БОШЛАБ ИНСОНПАРВАРЛИК ЁРДАМИ ЕТКАЗИБ БЕРИШ ҲАЖМИ ОШИРИЛАДИ – КўНИГА 600 ТА, ШУ ЖУМЛАДАН, 50 ТА ЁКИЛИГИ ЮКЛАНГАН ЮК МАШИНАСИ ЎТКАЗИЛАДИ. ФАЛАСТИНЛИКЛАР УЧУН 200 МИНГТА ЎТОВ ВА 60 МИНГТА МОБИЛ УЙ ЕТКАЗИБ БЕРИЛАДИ.

Аммо можаронинг оқибатлари ҳали ҳам минтақани ларзага солмоқда. Уруш Ҳизбуллоҳ ва Эрон иттифоқчилари каби Исроилга таҳдид солаётган кучларни занфлаштирди, аммо Ғазодаги гуманитар инкирозини янада оғирлаштирди.

Уруш 46 минг нафардан ошқ фаластинлик ва тахминан 1,5 минг нафар исроилликнинг ҳаётига зомин бўлди, Ливан ва Яманга ҳам тарқалиб, Исроил ва Эрон ўртасида ракета зарбалари алмашинувига сабаб бўлди. Бундай оғир жароҳатлар эса можаро иштирокчиларининг ҳали-бери ёдидан чиқмаслиги аниқ.

Бу келишув минтақанингни ўзини-ўзи тиклаш қобилиятини синовдан ўтказадиган имконият сифатида баҳоланмоқда. Ваҳоланки, гап фақат қил учид турган тинчликни сақлаб қолишга эмас, балки узоқ муддатли барқарор ечимга пойдевор яратиш ҳақида кетмоқда. Аммо томонлар ўртасида жуда катта оғриқ ва ишончсизлик борки, бу тинч келажак ҳақида ишонч билан гапириш имконини бермайди. Агар можарони ҳал этиш бўйича аниқ қадамлар ташланмаса, ҳатто вақтинчалик тинчлик ҳам узоқ давом этмаслиги маълум.

Яна бир ноаниклик шуки, урушдан сўнг Ғазони ким бошқаради? Охириги ҳафталарда ҲАМАС Миср воситачиларига Ғазо бошқарувини Фаластин маъмурияти билан ҳамкорликда ишлайдиган партиясиз ижтимоий бирдамлик қўмиталарига топширишга рози эканини маълум қилди. Аммо Фаластин раҳбари Махмуд Аббос ушбу режани қўллаб-қувватламаслиги маълум.

Бирок узоқ вақт кўрқув ва хавотирда яшаган одамлар бугун ушбу зиғирдек имкониятдан ҳам умидвор. Ғазодаги кўпчилик ўз уйларига қайтишни, Исроилдагилар эса яқинлари билан юз кўришишни орзу қиляпти. Эҳтимол, бу келишув можаронинг узил-кесил якуни бўлмас, аммо уруш даҳшатларини бошдан кечирганлар учун ўта зарур тинчлик эпкини бўлиши эҳтимолдан холи эмас.



Жаҳонгир НАХАНОВ «ISHONCH»



Барно Нарзуллаева Жиззах вилояти Галлаорол туманидаги Хўжакабут қишлоғида яшайди. У I гуруҳ ногирони, яқка тартибдаги тadbиркор, тиришқоқлиги ва меҳнатсеварлиги билан ҳаётда ўз ўрнини топишга интилаётган ёшлардан бири.

Ҳаёт ҳақидаги фикр-мулоҳазалари ва орзу-ниятлари кишини ҳаяжонга солади.

Шу боис унинг сўзларини ўз ҳолича эътиборингизга ҳавола этишни лозим топдик.



«Мен ҳаётни севиб яшайман»

«Мен дунёга келганда барча қатори ота-онанинг ҳам қувончи чексиз бўлган экан. Чунки мен икки ўғилдан кейин туғилган киз фарзанд эдим. Бироқ уларнинг қувончи узокқа чўзилмаган. Шифокорлар менга туғма фалажлик тахминини қўйишган. Хуллас, тенгдошларим қатори болалик гаптини суролмаганман. 5-синфда бутунлай юролмай қолдим. I гуруҳ ногирони сифатида инклюзив таълим бўйича, яъни уйда ўқишни давом эттирдим.

Болалигимдан рассомликка қизиқардим. Шу боис хунармандчиликнинг безак бериш санъатини ўргандим. 2017 йили мактабни тугатгач, яқка тартибдаги тadbиркор сифатида фаолиятимни бошладим. Хунармандлар уюшмасига аъзо бўлиб, тўғрақ очдим. Қишлоғимиз қизларига миниатюра асарлари, деворий суратлар, сопол лаганларга тасвирлар тушириш борасида сабоқ бера бошладим. Ёшлигимдан бошлаган ишимни охирига етказиш учун тинмай интилим ва ҳаракатларим аста-секин ўз натижасини кўрсатди.

2018 йилда хунармандлар ўртасида ўтказилган республика кўрик-танловида «Туризмга қўшган ҳиссаси учун» йўналиши бўйича голиб бўлдим. 2019 йилда «Ўзбекистон аёлларининг 100 та энг яхши инновацион лойиҳаси» танловининг республика босқичида фахрли биринчи ўринни қўлга киритдим. Бу ютуқлар менга сафимизни янада кенгайтиришга куч берди. Қисқа муддатда 50 нафар шогирд тайёрладим. Олинган 33 миллион сўмлик имтиёзли кредитдан мақсадли фойдаландим. 7 нафар фуқарони иш билан таъминладим. Уларнинг 5 нафари имконияти чекланган шахслар. Шогирдларим тайёрлаётган маҳсулотлар ўз харидорини топа бошладим. Нафақат юртдошларимиз, балки чет эллик сайёҳлар ҳам маҳсулотларимизни катта қизиқиш билан харид қилишмоқда.

Талаб ва истакларни инобатга олиб, онлайн тарзда масофадан туриб, хунармандчилик сирларини ўргатишни йўлга қўйдим. Телеграм гуруҳимиз бор. Унга видеосарсларни жойлаб, шогирдларга касбимиз сирларини ўргатиб келаямиз.

Ҳозиргача турли даражадаги танлов, фестивал ва кўргазмаларда иштирок этдим. 50 га яқин диплом ва мукофотлар совриндориман. «Ташаббускор ислохотчи», «Жиззах ифтихори» кўкрак нишонлари ва «Касорат» медалига лойиқ қўрилганман.

Мен ўз фаолиятимдан жуда мамнунман. Эзгу мақсад ва орзуларим бисёр. Улардан бири, замон талабига жавоб берадиган инклюзив хунар мактабини ташкил этиш.

Омадни қарангки, Аллоҳ мени Юртбошимиз билан учрашиш бахтига муяссар қилди. 2024 йил 9 апрель кунини Жиззах вилоятида фаоллар билан бўлган учрашувда мен ҳам ўз режаларим ҳақида гапирдим. Давлатимиз раҳбари мен билан кўришиб, тақлифимни қабул қилиб, тегишли идораларга топшириқ берганида кўзларимдан қувонч ёшлари оқди. Ҳозир топшириққа биноан Жиззах шаҳрида 100 ўринга мўлжалланган хунар мактабини куриш ишлари давом этмоқда.

Хунар мактабида безакли буюмлар ясаш, қулоччилик, миллий тақинчоқлар, ёғоч ўймакорлиги, оёқ кийимлар тўқиш, миниатюра, тасвирий санъат каби 7 та йўналиш очилди. Ижод мактабида сайёҳлар маҳсулотларининг тайёрлашни жараёнини кузатишлари мумкин, шунингдек, тайёр маҳсулотларини сотиш дўкони, кўргазма зали ҳам фаолият кўрсатади. Мактабнинг ётоқхонаси ҳам барпо этилади. Қўшимча тарзда мактабда турли тўғрақларни ташкил этиш ҳам режалаштирилган.

Ҳаёт ҳаракатлардан иборат, ҳаракат эса, яшаш учун курашдир. Умр, фурсат жуда тез ўтмоқда. Севимли шоиримиз Гафур Ғулум айтганидек:

*Умрдан ўтасан ҳар лаҳза учун,
Қудратли қўл билан қўйилган ҳайкал.*

Мен ҳам Янги Ўзбекистон тараққиётига қўлимдан келганича ўз ҳиссамни қўшама, ҳаётнинг ҳар дақиқасини кадрлаб, севиб яшайман».

Сўхбатдон:
Абдусаттор СОДИҚОВ

Эълон
2024 йил 15 ноябрда вафот этган, вафотида қадар Янгийўл шаҳри, «Бахт» МФЙ, КЗУ-8 кўчаси, 1-уйнинг 1-хонадонидида яшаган марҳум Лаврентьева Наталья Николаевнанинг мол-мулкига мерос иши очилганлиги маълум қилинади. Меросхўрлар Янгийўл шаҳрида хусусий амалиёт билан шугулланувчи нотариус Ш.Миролимовнинг нотариал идорасига мурожаат қилишлари сўралади. Манзил: Янгийўл шаҳри, Тошкент шох кўчаси, 52-уй ёнида жойлашган нотариал идораси.

Соғлиқни сақлаш ходимлари қасаба уюшмаси Республика кенгаши жамоаси тармоқ ходимлари қасаба уюшмасининг Сирдарё вилояти кенгаши ҳисобчиси Маъруф Аҳмедова падари бузруквори
Исмомил АХМЕДОВ
вафот этгани муносабати билан таъзия изхор этади.

«ИЗЛАМ»

ИСТЕЪДОДЛАРНИ КАШФ ЭТАДИ

Миллий гвардия ҳузуридаги Маънавият ва маърифат марказида «Излам-2» руқни остида чоп этилаётган китобларнинг тақдирот маросими бўлиб ўтди ва у том маънода ижодкорларнинг дийдор кечасига ҳам айланиб кетди.

Тақдиротда кенг жамоатчилик вакиллари, талаба ёшлар, ёш ижодкорлар, адабиётшунослар ва журналистлар иштирок этишди. Тадбирда китоблар муаллифлари томонидан театрлаштирилган бадий чикишларнинг намойиш этилиши, муаллифларнинг ўз асарлари қаҳрамонларига айланишлари иштирокчиларни ҳам бефарқ қолдирмади.

Тадбирнинг иккинчи қисмида китобхонлар муаллифлардан дастхат олиш ва ўзларини қизиқтирган саволларга жавоб олиш имконига эга бўлишди.

Китобхон жамят куриш санокли шахсларнинг саяб-ҳаракатларига боғлиқ эмас. Унинг шаклланиши жамятнинг умумий кайфияти ва миллий тафаккур даражаси билан бевоқифа алоқадор жараён. Бугун барча соҳаларда бўлгани каби адабиётга ҳам бозор тамойиллари кириб келиши китоб бозорига ўз таъсирини кўрсатмоқда. Шундай вазиятда ёш ижодкорларни қўллаб-қувватлаб, уларни китобхонларга та-

нитиш мақсадида «Академнашр» кўрсатган ташаббус ҳар қанча эътирофга лойиқ.

«Излам» лойиҳаси доирасида ўтган йили 9 нафар ижодкорнинг китоби чоп этилган бўлса, жорий йилда 15 нафар ёш ижодкорнинг асарлари 1,5 минг нусхадан нашр қилинди. Умид қиламизки, лойиҳа давом этади. Чунки ҳали биз билмаган ва эшитмаган истеъдодлар кўп. Албатта, уларни топамиз, кашф қиламиз, — дейди «Академнашр» раҳбари Санжар Назар.

Бу гал наср йўналишида 5 та, назмда 8 та, бадий публицистика ва адабиётшунослик бўйича 1 тадан асарлар чоп этилди. Шахриёр Шавкатнинг «Ҳам», Нозима Ҳабибуллаеванинг «Нафас», марҳум Мансур Жумаевнинг «Биз кутган фасл», Байрам Алининг «Босирик», Севара Алижонованинг «Маҳқум саёҳати» китоблари шулар жумласидандир.

Дарҳақиқат, ёш ижодкорларга имкониятлар яратилар, адабий кечалар уюштирилар экан, миллат ҳеч қачон ҳеч қимдан кам бўлмайд.



Қўллон айтганидек, «адабиёт юрак кирларини ювадиган тоза маърифат суви, хиралашган ойналаримизни ёғу ва равшан қиладиган, чанг ва тупроқлар тўлган кўзларимизни артиб тозалайдиган булоқ суви»дир.

Машҳура ЖўРАҚУЛОВА
«ISHONCH»

1960 йил июнида Бирлашган Миллатлар Ташкилотидида АҚШнинг Москвадаги элчиси хизмат хонасида узоқ йиллар осиглиқ турган давлат герби намойиш этилди. У кўз-кўз қилишга лойиқ эди: герб ичига кичик ҳажмли «жиҳоз» жойлаштирилган бўлиб, элчи хонасидаги барча сўхбатларни советлар назорат постига етказиб турган.


Воқеага қадар сўхбатларни ёзиб оладиган бундай жиҳоздан манаман деган махсус хизматларнинг хабари бўлмаган. Жиҳознинг ноёблиги шунда эдики, унинг тўхтовсиз ишлаб туришини таъминловчи қувватлантирувчи манба ва аксилразведка хизматлари назари ташадиган ҳеч қандай жиҳоз йўқ эди.

Микротўлқин товуши манбаси ҳаракатга келган заҳоти мазкур ноёб «жиҳоз» фаолиятга киришарди. Инсон овози қурилманинг резонансли тебранишларига таъсир кўрсатиб, сўхбатларни ёзиб оларди. Микрофон эса масофадан туриб етказиб бериладиган энергия талаб қилувчи генератор орқали микроимпульс тўлқини эвазига услуксиз ишлашда давом этарди.

Разведка тизимларида унга «Златоуст» коди берилди, тинглаш билан боғлиқ операция «Исповедь» («Икор») деб номланди.

Энди қурилма тарихи билан танишайлик.

Аввалига уни қадимги скиф қалқонига, кейин эса улкан мамонт тишига, яна швед қироли Густав олтинчи Николай иккинчига ҳадя қилган «Эриксон» телефон аппаратида жойлаштириш режаланади. Ҳатто филнинг оёқ қисмидан ишланган бир метрлик қоғоз солиб қўйиладиган кути ҳам қўриб чиқилади. Аммо конструкторлар микрофоннинг техник хусусия-



Ғаройиб гербнинг ТАҚДИРИ

тига ургу бериб, яъни «жиҳоз» сулавига эмас, сувенир «жиҳоз»га мослашгани лозимлигини таъкидлаб, юқоридаги барча тақлифларни рад этишди. Ҳадяни тайёрлаш билан бир вақтда, унинг ичига микрофонни жойлаштириш талаб этиларди. Бунинг устига, операция фош бўлиб қолмаслиги учун микроскоп излар қолдирмаслик йўллари ахтариш лозим эди.

Нихоят, муаммо ҳал этилади. 1945 йилнинг 4-11 февраль кунлари Ялтада «катта учлик» — Сталин, Рузвельт ва Черчилль учрашуви ўтади. Совет махсус хиз-

матлари айнан шу кунни Америка элчисининг хизмат хонасига эши-туви «жиҳоз»ни жойлаштиришга қарор қилишди. Операцияни ўтказиш 9 февралга мўлжалланди, айнан ўша кунни «Артек» лагерининг 20 йиллиги нишонланди ва унга Меҳнат Қизил байроқ ордени топширилиши режалаштирилди. Шу муносабат билан Ташки ишлар вазири Молотов Сталиннинг ёнида туриб Рузвельт ва Черчилльга бола-болаларча сўхбатларни қўриб берди.

Давлат етакчилари, ҳатто ташки сийсаат маҳкамалари раҳбарлари «Артек»ка бормасликларни аниқ эди. Демак, тадбирда американинг Москвадаги элчиси Гарриман ва унинг инглиз ҳамкасби иштирок этишлари кутилди.

Мўлжал тўғри олинганди. Шу кунги маросимда америкалик меҳмонга Қўшма Штатларнинг ёғочдан ишланган, устига суртилган лак ярқираб турган салмоқли герб эсдалик учун топширилди. Бу совға роппа-росса саккиз йил Америка элчисининг махфий хизмат хонаси деворида савлат тўқиб туради. Янаям қизик жиҳати, шу давр мобайнида тингловчи «жиҳоз»ли герб совет махсус идораларини тўртта элчининг қулдалик фаоли-

тидан воқиф қилади...

Маълумки, янги иш бошлаётган дипломатик ваколатхона раҳбари хизмат хонасини ўз таъбиғига кўра ўзгартиради. Қизғин, ҳеч қайси элчи гербни олиб ташлашга жазм этмайди. Яна таъкидлаш жоизки, элчихонадаги махсус хизмат вакиллари мунтазам равишда хонадаги бошқа ашёлар қатори гербни ҳам назоратдан ўтказиб туришди, лекин унда тингловчи «жиҳоз» борлигини сезишмайд.

Совет разведкасининг Берлиндаги резиденти Попов соткинлик қилмаганида «Златоуст» яна анча йиллар махсус идораларга «хизмат қилиши» тайин эди. Иш шу билан битмайди. Аввалига америкалик мутахассислар махсус лабораторияда «Златоуст»га ўхшаш ускуна ишлаб чиқишга уриниб кўрадилар, аммо удалай олмайдилар. Англияликлар ҳам айнан шундай «жиҳоз»ни яратишга қодир эмасликлари маълум бўлади ва «Златоуст»нинг барча кирдикорларини билолмай доғда қоладилар.

Ғаройиб гербнинг тақдири Марказий разведка бошқармасининг Лэнгли музейига жойлаштириш билан ҳал бўлади. Айтишларича, у ҳали ҳам шу музейда сақланаётган экан...

Аброр ХОН

MYACCCS:
O'zbekiston
kasaba
uyushmalari
Federatsiyasi

ISSN 2010-5002
2007-yil
11-yanvarda
O'zbekiston
Matbuot va axborot
agentligida 116-raqam
bilan ro'yxatga olingan.

«Ishonch» va
«Ishonch-Доверие»
gazetalarini
tahrir hay'ati:

Qudratilla RAFIQOV
(tahrir hay'ati raisi),
Ulug'bek JALMENOVI,
Anvar ABDUMUXTOROV,
Sayfullo AHMEDOV,
Akmal SAIDOV,
Ravshan BEDILOV,
Oqtlimurot SOBIROV,
Suhrob RAFIQOV,
Shoqosim SHOISLOMOV,
Hamidulla PIRIMQULOV,
Nodira G'OIYIBAZAROVA,
Anvar QULMURODOV
(Bosh muharrirning
birinchi o'rinborsari).

Mehrididdin SHUKUROV
(Mas'ul kotib — «Ishonch»),
Valentina MARSENYAK
(Mas'ul kotib — «Ishonch-Doepuev»)

Bosh muharrir
Husan ERMATOV

Bo'limlar:
Kasaba uyushmalari hayoti —
(71) 256-64-69
Huquq va xalqaro hayot —
(71) 256-52-89
Milliy-ma'naviy
qadriyatlar va sport —
(71) 256-82-79
Xatlar va muxbirlar
bilan ishlash —
(71) 256-85-43
Marketing va obuna —
(71) 256-87-73

Hududlardagi
muxbirlar:
Qoraqalp'iston
Respublikasi —
(+998-99) 889-98-20
Andijon viloyati —
(+998-99) 889-90-23
Buxoro viloyati —
(+998-99) 889-90-31
Navoiy viloyati —
(+998-99) 500-05-12
Jizzax viloyati —
(+998-99) 889-90-34
Namangan viloyati —
(+998-99) 213-09-66
Samarqand viloyati —
(+998-99) 889-90-26
Sirdaryo viloyati —
(+998-99) 889-98-55
Surxondaryo viloyati —
(+998-99) 379-19-70
Toshkent viloyati —
(+998-99) 600-40-44
Farg'onaviy viloyati —
(+998-99) 889-90-24
Xorazm viloyati —
(+998-99) 889-98-01
Qashqadaryo viloyati —
(+998-99) 705-08-93

«Ishonch»dan olingan ma'lumotlarda
manba sifatida gazeta nomi
ko'rsatilishi shart.
Mualliflar fikri tahririyat
nuqtai nazaridan
farqlanishi mumkin.

Navbatchi muharrir:
A. Abdurahmonov

Mudabbihtar:
D. Xudobeghanova,
D. Ravshanova

Sahifalovchi:
H. Abduljalilov

Bosishga to'pshirish vaqti — 23:20
Topshirildi — 23:40

Bahosi kelishilgan narxda

Manzilimiz:
100165, Toshkent shahri,
Buxoro ko'chasi, 24-uy.
E-mail: ishonch1991@yandex.uz

Gazeta haftaning sheshanba,
payshanba va shanba
kunlari chiqadi.
Gazeta «Ishonch»ning
kompyuter markazida
teritid va sahifalandi.

Nashr ko'rsatkichi: 133

Umumiy adadi

32 360 ta

Shundan:

6 263 nusxasi

«Sharq» nashriyot-matbaa
aksiyadorlik kompaniyasi
bosmaxonasi —
Toshkent shahri,
Buyuk Turon ko'chasi,
41-uyda;

18 231 nusxasi

«Erudit» MCHJ bosmaxonasi —
Samarqand shahri,
Spitamen ko'chasi,
270-uyda;

7 866 nusxasi

«Poligraf-Press»

MCHJ bosmaxonasi —
Marg'ilon shahri,
Turkiston ko'chasi,
236-«b» uyda
chop etildi.

Gazeta offset usulida,
A-2 formatida bosildi.
Hajmi 2 bosma tabqoq.
Buyurtma 037

1 2 3 4 5 6

Азиз газетхон!

Мароқли дам
олинг!



Агарчи сенсизин сабр айламак,
эй ёр, мушкулдур,
Сенинг бирлан чиқишмоғлиқ
доғи бисёр мушкулдур.

Замира СУЮНОВА ижросида

«МУШКУЛДИР» қўшиғи

Заҳириддин Муҳаммад Бобур газали